

Službene novine FBiH 47/12

Na osnovu člana 12. stav 3. Zakona o unutrašnjoj trgovini ("Službene novine Federacije BiH", broj 40/10),
Federalni ministar trgovine donosi

UPUTSTVO

O POSTUPKU PREGLEDA I NADZORA ELEKTRONSKIH MJERNIH SISTEMA NA BENZINSKIM PUMPNIM STANICAMA

I. UVODNE ODREDBE

1. Ovim uputstvom propisuje se postupak pregleda i nadzora elektronskih mjernih sistema na benzinskim pumpnim stanicama (u daljnjem tekstu: BS) koju vrše nadležni organi tržišne inspekcije, Federalni zavod za mjeriteljstvo (FZZM), pravna lica imenovana od strane Instituta za mjeriteljstvo Bosne i Hercegovine (IMBIH), a u skladu sa Zakonom o mjeriteljstvu BiH („Službeni Glasnik“ BiH br. 19/01) i Pravilnikom o načinu evidentiranja i kontroli prometa naftnih derivata putem ugrađene opreme na benzinskim pumpnim stanicama u Federaciji Bosne i Hercegovine ("Službene novine Federacije BiH", br:84/11 i 39/12).

II. PREGLED I PROVJERA ELEKTRONSKIH MJERNIH SISTEMA NA BS

2. Nadležni inspeksijski organi i FZZM iz člana 12. Pravilnika vrši sljedeće provjere:
 - Da li vlasnik BS ima zaključen ugovor sa serviserom koji vrši ugrađivanje i održavanje, odnosno servisiranje AMN na BS i koji je za te poslove saglasno članu 4. Pravilnika ovlašten od strane ministra FMT,
 - Da li faktičko stanje broja rezervoara za skladištenje tečnih naftnih derivata, broja AMN i broja pumpnih automata za istakanje na BS odgovara stanju u tehnološkoj šemi BS,
 - Da li je označavanje tečnih naftnih derivata na rezervoarima za skladištenje i pumpnim automatima usklađeno sa Odlukom o kvalitetu tečnih naftnih goriva (derivata),
 - Da li AMN i ugrađeni pumpni automati na BS imaju certifikate o odobrenju tipa izdate od strane IMBIH-a, certifikate o verifikaciji izdate od imenovane laboratorije i verifikacijske oznake od strane imenovane laboratorije i FZZM,
 - Da li BS posjeduje odgovarajuće certifikate (Tabele) o verifikaciji zapremine rezervoara za skladištenje tečnih naftnih derivata urađene od strane imenovane laboratorije i ovjerene od strane FZZM.
 - Da li za pojedine rezervoare podaci, izmjereni ili utvrđeni na licu mjesta za: visinu stuba derivata, količinu (volumen) derivata, temperaturu derivata i prisutnost vode u rezervoaru u realnom vremenu, odgovaraju očitanim podacima sa ispisa konzole AMN-a, koji se odnose na: visinu stuba derivata, količinu (volumen) derivata, temperaturu derivata i prisutnost vode u rezervoaru u realnom vremenu.
 - Da li gustina naftnog derivata izmjerena na licu mjesta odgovara relevantnom podatku iz deklaracije za nabavljenu vrstu derivata u rezervoaru,
 - Provjeru funkcionisanja svih zabilježenih alarma na AMN konzoli, a koji se odnose na: količinu goriva u rezervoaru (nisku i visoku razinu goriva), registrovanje neispravnosti nekih od sistema mjerenja, registrovanje alarma na promjenu nivoa naftnih derivata kada nema utakanja naftnih derivata u rezervoar ili istakanja iz rezervoara, provjera sistemskih alarma koji signaliziraju neispravnost pojedinih dijelova sistema i greške u rukovanju,
 - Provjeru da li je BS uvezana i može li komunicirati sa informacionim sistemima nadležnih kontrolnih organa, i da li mogućnosti te komunikacije zadovoljavaju zahtjeve iz članova 3., 7., 8., 9., 10. i 11. Pravilnika.
3. Najveća dozvoljena greška mjerenja utvrđena je:
certifikatom o odobrenju tipa mjerila za AMN koji izdaje IMBIH. Najveća dozvoljena greška AMN-a ne smije biti veća od:
 - ± 1mm prije instalacije, odnosno
 - ± 4mm poslije instalacije.certifikatom o odobrenju tipa mjerila za pumpni automat koji izdaje IMBIH. Najveća dozvoljena greška pumpnog automata ne smije biti veća od:
 - ± 0,5%.
4. Izvještaj o izvršenim pregledima i provjerama iz tačke 2. i 3. ovog Uputstva, FZZM i nadležni inspeksijski organ dostavlja Federalnom ministarstvu trgovine. Izvještaj treba da sadrži: redni broj, naziv i sjedište privrednog društva; ime B.S., broj pumpi, datum kontrole, utvrđeno na B.S. (nedostaci i koja je mjera izrečena), datum

kontrole FZZM, naziv serviser, proizvođač sonde; verificirana(da ili ne); dostavlja li uredno podatke u FMT, ime inspektora koji je izvršio kontrolu, datum konačne provjere ispunjavanja uvjeta iz Pravilnika.

5. Stupanjem na snagu ovog uputstva prestaje da važi Uputstvo o postupku, pregleda i provjere elektronskih mjernih sistema na benzinskim pumpnim stanicama ("Službene novine Federacije BiH", broj 26/11).
6. Ovo uputstvo stupa na snagu narednog dana od dana objavljivanja u „Službenim novinama Federacije BiH“.

Broj 01-02-865/12
22.maj 2012. godine
Mostar

Ministar
Milorad Bahilj, s.r.